

N O R N U E L L A
DE
TRICHOSI ET TRICHOME.

DISSERTATIO INAUGURALIS

MEDICO - PATHOLOGICA

QUAM

**CONSENSU ET AUCTORITATE
GRATIOSI MEDICORUM ORDINIS**

IN

**UNIVERSITATE LITERARUM CAESAREA
DORPATENSI**

AD GRADUM

DOCTORIS MEDICINAE

RITE IMPETRANDUM

P U B L I C E D E F E N D E T

AUCTOR

Oscar Konalewski,

MEDICUS PRIMI ORDINIS.



DORPATI LIVONORUM,

TYPIS HENRICI LAAKMANNI.

MDCCXLVII.

PATRI DILECTISSIMO

Imp r i m a t u r
haec dissertatio, ea tamen conditione ut, simulac typis fuerit excusa,
quinque ejus exempla tradantur collegio ad libros explorandos constituto.

Dorpati Livon. die XXVI mens. Maii 1847.

Dr. **Bidder**,
(L. S.) ord. med. h. t. Decanus.

JULIANO KOWALEWSKI

HOC OPUSCULUM

D. D. D.

D 17-327

FILIUS.

PROLEGOMENA.

Quum anno millesimo octingentesimo quadragesimo quinto Galliciam et terram cracoviensem peragrarem, saepius mihi complures homines trichosi laborantes observandi occasio oblata fuit, id quod pariter Petropoli contigit, ubi nonnullos ejusmodi aegrotos ex Lithuania oriundos inveni. Quum autem tempus reique cognitio ad investigandas endemicas rationes, quae in evolvendo et provehendo morbo in solis polonicis provinciis tam frequenter obvio alicujus momenti essent, et ad usitatis-simas curationes talium aegrotorum ad ipsorum lectum cognoscendas, me defecerint, hisce arctioribus terminis meam dissertationem coërcendam esse puto, ut maxime proprios characteres, quibus trichosis, ut morbus, præcipue excellat, atque naturam trichomatis rationemque, quae huic cum trichosi intercedat, quantum in me est,

illustrem. Id eo magis faciendum putavi, quod, ad hunc diem, quod vehementer dolendum est, nulla distincta accurataque trichoseos imago, qua morbus esse cognoscatur, neque vera trichomatis existimatio exstitit. Haec adumbratio trichoseos, trichomatische explicatio, nec non nonnullae microscopicae observationes, quas, socio amicissimo D^{no} Płaskowski, artis medicae cultore, in trichomate maturo et genuino, nuper a nobis desecto, instituere contigit, secundam opusculi mei partem efficient. Quantum autem diversarum de hoc morbo sententiarum rationem habere, nonnullaque historica facta de eodem colligere, variasque appellations, quibus morbus vocari solet, percensere potui, ea omnia in priore dissertationis parte commemorata sunt.

Pars prior.

Diversae de trichosi et trichomate sententiae. Variae eorum appellations. Notationes historicae.

Perpauci morbi sunt, de quorum existentia, origine, propagatione, totaque natura, tam variae, saepius inter se repugnantissimae sententiae proferantur, quam de hac ipsa, de qua nos quaerimus, trichosi. Inter eos, qui pertinacissime morbi existentiam negent et fanaticos erroris sui tenacissimos, qui sub quovis morbo, qui in Polonia usu veniat, trichosim subesse suspicentur, permultae aliae sententiarum varietates intermediae sunt, unde dictum creberrimum, quo quidem quot capita tot opiniones esse feruntur, hoc maxime loco usum habere videtur. Sic, ut gravissimas sententias appellem — antiquiores auctores, *Diversae scriptorum opiniones de trichosi* et recentiores: *Wolfram*, *Larrey*, morbum a syphi-^{scriptorum opiniones de trichosi} lide³derivare conati sunt; dum alii rursus ut *J. Frank*¹⁾ p. 529, *et trichomate*. *Gumpert*²⁾ p. 172 etc. pro lepra transformatione habent; alii, sicuti *Hartmann* et *Brandt*³⁾ p. 413 eum arthriticam affectionem esse censent, alii denique, iisque longe plurimi, scriptores polonici, trichosim peculiarem interpretantes, ex dyscrasia sanguinis, cuius originem in variis causis ponunt, deducendam esse

arbitrantur. Sic *Hoffmann*⁴⁾, eam dyscrasiam trichomaticam ex terra argillaceae, soli intosi et fornacum talium similiumque rerum exhalationibus per respirationem in sanguinem receptis deduxit, sic *Jourdan, Knothe*⁵⁾, eam dyscrasiam ex lymphaticorum vasorum affectione derivarunt, sic *Sennert, Bonfigli* et imprimis tempore recentissimo *Oczapowski*⁶⁾ p. 150 aquae potabilis indolem, praesertim, quem ultimum nominavi, vir doctissimus aquam calcariam sulphuricam continentem, dyscrasiae causam duxerunt, sic denique *Szokalski*⁷⁾ p. 368 nimium usum ciborum potionumque acidorum, quae Poloni ut divites sic pauperes maxime amant, balneis vaporeis eodem tempore neglectis, pro primario ejusdem fonte habuit. Silentio praetermittendam censeo opinionem eorum, qui, sicuti *Pastorius* fecit, trichosim aqua potabili per Tartaros, qui inter annos 1285—1288 regnante Lesco nigro tertium in Poloniam incursum fecerunt, venenis infecta originem habuisse arbitrati sunt, quae sententia pro statu, quo disciplinae medicac hodie sunt, nisi in historia artis medicae, locum habere nequit.

Non minus de ipsius trichomatis natura sententiae differunt. Qui, trichosim nullam esse censentes, trichoma pro producto arte facta habent, inter quos sunt *Roussille-Chamseru, Wolf, Gasc* etc., ii capillorum cultu omisso, impuritate, calidioribus capitis tegumentis aliisque rebus trichoma provocari judicant. E contrario, qui trichoma morbosum productum putant, idem vel follicularum capillarium affectione, e locali irritatione nata ut *Schlegel*⁸⁾ p. 104, exstitisse ajunt, vel endemicam crisin esse arbitrantur, quae crisi, quemadmodum *Marcinkowski*⁹⁾ p. 24 censem, ad diversissimas tum acutas tum chronicas affectiones comitem se adjungere possit. Alii, praesertim plerique polonici medici, trichoma pro vera trichomatici morbi crisi habent. Pariter diversissimae sententiae de modo, quo ipse intricationis actus fiat, prolatae sunt, quam ad rem infra locus erit, ubi redeat oratio. Tristior etiam species, si symptomata proposita, morbique curationes, quales adhuc prolatae sunt, contemplamur,

nobis offertur. Namque nullus fere morbus in speciali pathologia est, quo oriente trichosis non incusata fuerit; neque fere ulla in generali therapia methodus, quae in tractanda trichosi in usum vocata non sit. Pleraque pharmacopolarum copiae, cum laetiore vel tristiore eventu in aegrotis tentatae fuerunt. In variis, quae morbo imposita sunt, nominibus non alia res est, quum opinionibus perquam miris, quas vulgus medicique de morbi natura conceperant, nominum non minus mirabilium formationem acceptam referamus. Hodie etiam plerique medici iisdem appellationibus, tum in notando morbo, tum in locali capillorum intricationis phaenomeno designando uti consueverunt; nomenque plicae polonicae ad hunc diem et in plerisque de speciali pathologia libris et in monographiis, tanquam quo hic morbus aptissime significetur, obvium esse solet.

Neque minus incerta et ambigua omnia apparent, quae ad vetustatem, ad patriam et propagationem morbi attinent. Sunt qui cum *Marcinkowski, Lessing*¹⁰⁾, *Oczapowski* morbum tam diu in Polonia, quam ejus historiam, exstitisse voluerint. *Schlegel* ejusdem originem ad saeculum undecimum refert, *Pastorius* multique alii, qui ejus sententiae adstipulati sunt, ut *Gehema, Stabel, Erndel* morbum tempore incursionis Tartarorum saeculo decimo tertio factae, ortum esse censem; alii ut *Weese*¹¹⁾, cuius praeclara de trichosis in Polonia aetate investigatio meritis laudibus effertur, morbum in Polonia saeculo sexto decimo initium habuisse contendunt. Nonnulli trichosim principio in Germaniae regionibus ortam volunt; ibique endemicam judicant, alii epidemice propagari, alii passim in variis terrae regionibus inveniri credunt. Denique, ut paucis rem absolvam, diversissimas de ejus tempore notationes, diversissimas de propagationis modo sententias proposuerunt, et plurimarum affectionum tum acutarum, tum chronicarum symptomata causasque, nomina maxime mirabilia, omnesque fere curandi methodos, medicamentaque materiae medicae diversissima ad eas quas sibi de trichosis effinxerant ideas traxerunt, ita ut, quum a multa sciendo ad

ignorandum perventum esset, pariter atque antiquus ille philosophus de se praedicavit, nos de trichosi dicere possimus, id solum certum fuisse nihil sciri. Tali modo de morbo actum erat, trichosis pro phantasmate habita, trichoma pro artis producto.

Haec quam modo diximus sententia de morbo prorsus non extante, aetate recentissima a Dr^e *Beschorener*¹²⁾ directore marodochei ovincensis in magno ducatu Posnaniae et Dr^e *Weese*¹³⁾ physico circuli thornensis ibidem, rursum in lucem prolata fuit. Hi duo viri clarissimi, ingenti factorum serie innixi, audacter in eam sententiam discesserunt, qua trichoma nihil aliud, nisi cultus capillorum secundum vulgi praejudicatam opinionem neglecti necessarium productum, neque trichosim per se morbum sui generis esse judicabant; ideoque, ut ea funditus tolleretur, vulgo meliora edocendo contingere posse. Ut exoptatissimum laetissimumque fuit ab his viris accuratam statisticam trichoma habentium enumerationem accepisse, cum praesertim, quae sola ante *Lafontaine*¹⁴⁾ p. 11 et *Chromy*¹⁵⁾ p. 21 ex specie tantum protulerant, vix nomine medici census digna sint: sic altera ex parte dolorem nobis moeroremque commoveat, quod duo viri tam intelligentes judicioque liberi, quales *Beschorener* et *Weese* videntur, in eam opinionem delapsi fuerunt, quae praeterquam quod trium saeculorum experientiae et plerorumque medicorum judiciis, omni studio veras trichomaticas affectiones observantium, prorsus repugnat, summa etiam damna et incommoda in multis aegrotorum millibus tractandis afferre possit. Feliciter tamen evenit, ut nostro tempore perpauci inveniantur medici, qui eandem atque *Beschorener* et *Weese* sententiam defendant. Sunt inter hos *Fritsch*¹⁶⁾ p. 202 *Flatovii* et *Scherbel*¹⁷⁾ p. 30 Lissae polonicae. Sententia a *Beschorener* et *Weese* proposita, neque nova est, ut ipse *Weese* confitetur, neque vera, quemadmodum infra ex factis videbimus.

Dr *Davisson*¹⁸⁾ p. 43 et ¹⁹⁾ p. 308 *Scotus*, archiatrus regis Joannis Casimiri, primus ut trichosim pro phantasmate,

ita trichoma pro artificiosa capillorum intricatione habuit. Is in opere suo a. 1660 edito „de plica polonica“, velut de morbo ex superstitione mulierum cerebro nato et in credulos aliquos medicos transplantato agit. Jam illo tempore ea opinio acerba antigrapha ab episcopo Rossiae albae *Skuminowski* et professore *Plempio Lovani* conscripta provocavit. Testimonium, quod medicus temporis, quo trichosis late per Polonię propagata est, proximus edidit, profecto multum momenti haberet, si quidem ejus auctoritati satis fidei haberi posset. *Davisson* enim sibi ipsi satis non constituit, nunc morbum extare negans, nunc in trichosi, ut peculiari morbo specificam curationem, ut in syphilide, scorbuto etc. opus esse affirmans⁶⁾ p. 456. *Davisson* triginta annorum spatio, per quod medicam artem in Polonia exercuit, cuique sordido et superstitoso homini sine ullo incommodo trichoma desecuisse sibi videtur. Complures *Davisson* assecias nactus est, nam omni tempore homines non desunt, qui opinionibus perquam absonis et absurdis assentiant, si modo eae cum aliqua protervitate et quadam fiduciae et persuasionis specie exprimantur et perforantur. Num melior ratio erat brussaiismi? nonne vel recentissimis temporibus ope homoeopathiae et hydropathiae omnibus morbis mederi conati sunt? non syphilidem adeo contagiosum morbum esse negarunt? Tales sententiae summam cum parasiticis fungis similitudinem habent, qui, simulatque solum idoneum adepti fuerint, exemplo radices agant. *Davissonii* sententia, quae a *Conrado Sprengel*, *Landeute*, *Hirsche*, *Kreuzer* etc. repetita fuit, praecipue tempore recentiore a medicis franco-gallicis, ut *Willermay*, *Larrey*, *R. Chamseru*, *Gasc* aliisque qui tempore expeditionis Bonaparte trichoma saepius in transversu forte viderant rursus suscitata, eodem tempore multifariam inter medicos polonicos resonavit. Quae ratio quum non diu durasset, tota fere medicorum multitudo ad verum judicium de dyscrasica morbi natura revertit. Sic se res habuit, cum viri cl. *Beschorener* et *Weese*, positivis factis confisi, sententiae, quae ad id

tempus non firmo fundamento stabilita fuit, longe majorem gravitatem addere studuerunt. Ea opinio vero quam parum defensionis habeat, ex factis, in altera parte dissertationis allatis, quae trichosim re vera extare coarguant, facile intelligimus, quam ob rem, ne eadem saepius repetamus, ad eum locum lectores delegandos arbitramur.

Refutationes.

Qui morbi originem syphiliticam interpretantur, solo tempore morbi per Poloniam propagati, ossiumque affectione in trichosi obvia eo affecti sunt. Quamvis autem interdum trichosis cum syphilide conjungi queat, uterque tamen morbus diversi omnino generis est. Dum syphilis maximam partem aetate juvenili exulceratione, directo contactu plerumque genitalium in concubitu praegresso, nascitur, trichosis contra assimilationis malo creberrime in pueritia ac senectute reperitur. Praeterea si forte trichosis contagiosa apparet, modus tamen et locus contagii prorsus alii sunt. Sin autem trichomatis formatio syphilis secundaria vel tertaria endemicis influxibus mutata esse fertur, ea tamen quaestio restat, cur maxime syphilis neque alii morbi talem endemicam formam induant? Sic in omnibus syphiliticis Poloniae nunquam trichoma ex syphilide consecutum visum est, ni forte uterque morbus complicatus apparuit, pariterque multi trichomatici aegroti inveniuntur, qui syphilide nunquam laboraverint. — Neque vero origo, decursusque morbi minus a lepra differunt. Vetustissimi chronicorum scriptores, qui de Tartarorum incursu referunt, de epidemia, quae belli tempore persaepe oriri soleat, loquuntur, neque vero usquam a Tartaris lepram in Poloniam introductam esse narrant. Non magis ad hunc diem in Asia trichomata visa sunt, quam saeculo tertio decimo in reliquis Europae partibus, quo tempore lepra tam late dominabatur. Cum arthritide morbus noster articulorum affectionem quidem, quod ad sedem attinet, communem ostendit, attamen utriusque morbi producta, in priore concrementa lapidea, in altera liquoris peculiaris, magis minusve spissi et conglomerati, depositio, valde inter se discrepant. Huc

accedit, quod decursus, crises, proprietates comitantium et consequentium affectionum in utroque morbo haud parum differunt. Arthritis hereditaria luxuriae intemperantiaeque Bacchi et Veneris possessio, vulgo pauperioribus populi ordinibus parcit, trichosi omnes promiscue divites pariter atque pauperes invadente. Praeterea utrumque morbum in multis hominibus alterum ab altero non pendentem occurrere viderunt.

Inde in eam sententiam recidunt, ut syphilidem, lepram atque arthritidem, in sola Polonia talem speciem induere posse, vel, quemadmodum *Marcinkowski*⁹⁾ p. 24 ait, in omnibus acutis chronicisque, affectionibus trichomatis formationem endemicam crisis existere dicant. Quum autem omnes, qui in Polonia habitant, homines pariter iisdem endemicis influxibus obnoxii sint, dictu difficile est, cur maxime unus idemque morbus nunc crisis sibi propriis, nunc capillorum affectione formandoque trichomate resolvatur? Et qualem notionem haec endemicica crisis in trichomaticis bestiis habeat, tam saepe obviis, quae omnino tam raro morbis laborare solent? Capillorum autem non est, crisis suscipere, quali modo aliis excretoriis organis effici potest. De capillis oratio est, neque de folliculis capillaribus, namque adeo capillos adscitios et sanos ab aliis sumtos capillamentaque artificialia peculiaribus capitum exhalationibus exposita intricando trichomata fieri videmus. Itaque varios acutos et chronicos morbos nunc capitum exhalationem, qua capilli intracentur, nunc qua non intracentur, producere consequitur. Haec ipsa specifica capitum exhalatio, capillos implicans, proprii morbi est, quem nos trichosim appellamus; affectionesque acutae et chronicae, quae eam comitari solent, ab aliis similibus, quemadmodum infra videbimus, tantopere discrepant, ut nisi ad trichomaticam suam originem referri nequeant. Posse autem trichosim trichomatisque formationem cum syphilide, lepra, arthritide variisque tum acutis tum chronicis affectionibus connecti, id quod maxime pravitatum ansam praebuit, hoc quidem eo minus mirabimur, quod in aliis etiam morbis ejus generis complicationes observandi occasio non

deest. Qui primus de trichosi in Polonia scripsit, celeberrimus *Starmigelius*¹¹⁾ p. 333 multo id cautius fecit, quam qui post eum extiterunt rei investigatores. Is enim l. c. haec dicit: „cum exhalatione fuliginosa ex qua nascuntur crines communicat, videoturque cum tinea affinitatem habere, atque cruciatu ossium cum Gallica iue, cum phthiriasi redundatione vermium, cum arthritide artuum dolore, cum spasmo miserabili membrorum contractione.“

Qui sanguinis dyscrasiam assumunt, eamque, sicuti Hoffmann facit, ex terrae argillaceae exhalationibus receptis originem ducere volunt, ii quidem non reputant in illis maxime regionibus, in quibus quum solum minimum argillae contineat, ideo argilla ad aedificandum non adhibetur, uti in locis montuosis Rossiae rubrae, morbum frequentissime inveniri, rarius contra in his Poloniae regionibus, ubi solum argillae omnino plenum est, ideoque eadem materia ad struendum uti solent. Quod autem Knothe aliquie scriptores lymphatici systematis affectiones trichoseos causam esse arbitrantur, minus etiam defendi posse videtur, quia ea affectio, si adest, non est, nisi sequela. Pariter duritiae scrophulose, vasorum, glandularumque lymphaticorum non pro scrophulosi ipsa sed ejus effectu habendae sunt. Neque magis, quod Oczapowski affirmat, usus aquae potabilis, calcariam sulphuricam continentis, pro unica trichomaticae dyscrasiae causa haberri possit, quoniam in sola Polonia, neque in omnibus Europae terris, ubi rivorum aqua pariter calcariam sulphuricam habet, ea trichomatis formatio observatur. Similiter, cur usus ciborum potionumque acidorum, quem Szokalski certe injuria ad verum abusum progrederi contendit, trichosim efficere credatur, satis explicari non potuerit. Namque cur tandem primis pueritiae annis a primo usque ad quintum, ubi quidem minimum cibi acidi consumi certum est, inter omnes aetas, frequentissime trichoma invenitur? Quin adeo casus observati sunt, quibus recens nati, infantesque primis vitae mensibus quibus nisi matrum lacte frui non licuit, trichosi afficerentur? Facta, e quibus acidis cibis potionibusque non adhibitis trichomatis efformatio-

nem occurrisse discimus, trichoma trichosimque a nutrimentorum natura non pendere demonstrare videntur. Quod ni foret hereditaria et contagiosa morbi natura assumenda esset, quam in sententiam Szokalski non inclinat. Non minus processus, quibus trichomatica dyscrasia sanguinis abusu ciborum potionumque acidorum formetur, explicare, atque, quomodo balneorum vaporeorum usu ejus efformationem praevertere liceat, intelligere difficillimum erit.

Non posse autem capillarium follicularum affectione locali trichoma existere, eo facto satis probatur quod sani desecti capilli, quos cum trichomatica materia ex capite exsudata in contactum adduxeris, ipsi trichomatum instar intricari possunt. Quin sola inquinatio, vel cultus capillorum neglectus eos perturbare possint, neminem dubitaturum credo; ut autem intricatio morbosa producatur, aliae res accedant necesse est, quae quales sint, in altera dissertationis parte exposituri sumus.

Quod ad diversa morbi nomina attinet, ea quidem nos non *Diversae appellations*. deficiunt, at omnia fere minime rationali designationi respondent. Qui vulgi opinionem amplexi trichoma a malis daemonibus vel beneficiis produci censem: morbum, ut in septentrionali Germaniae parte *Marenflechte* appellabant, in ripis Rheni superioris *Schroetlingszopf*, in Dania *Marenleck* et *Marelock*, in Suecia *Martofra*, quo eodem significatu alia nomina linguae germanicae *Hexenzopf*, *Hexekzopf*, *Alpzopf*, et polonicae *Wieszczyca*, *Krzyszycy*, *Gosplotla*, *Kolktki* usurpata sunt. Duas primas vulgi appellationes Schenk ad verbum lingua latina vocabulis *tricae incuborum* et *scrophorum tricae* reddit. Nomen vetustum germanicum *Bichtelzopf* secundum Sennert derivatum a verbo *Bichtel*, (infantem non baptisatum designat) inde deductum est, quod trichoma frequenter in Judaeorum infantibus inventum fuit, ex quo fonte alterum etiam vocabulum *plicae judaicae* manavit. Num autem nomen *Weichselzopf*, quod usu universalis ad designandam trichosim et trichoma adhibetur, ex voce prius

usurpata Bichtelzopf, *Wichtelzopf*, *Wixelzopf*, corruptum sit, an quia trichoma in Vistulae accolis saepius quam alibi (re vera longe rarius quam in aliis Poloniae regionibus) repertum sit, an quod evaporationes hujus fluminis, secundum antiquam opinionem, pro fonte trichoseos habitae sint, formatum fuerit, ea de re difficile est judicium facere. A specifico doloris sensu, veluti clavi capiti infigantur, qui sensus plerumque trichomatis formationi praecedere solet, apud antiquissimos Polonorum scriptores Oczko et Syreński, nomen Kołtun occurrit, quod Roxolanis Rutheniae rubrae incolis pervulgatum est unde „ruski kołtun“ a Syreński dicitur. *Gwoździec*, *Goździec*, Polonorum vulgaris appellatio ab Oczko eodem significatu adhibita est, quo nomine oppidulum etiam Rossiae rubrae, ubi primum morbus „Gwoździec“ apparuit, ab eodem vocatur. Eorum nominum interpretatio accurata clavus et helos ab Agricola et Minadoo introducta est. Qui sub trichosi syphilidem latere opinabantur morbum luem Sarmaticam, Fulginatus luem pucutiensem; Richter luem colutiniam appellarunt. Antiquissimi autem Polonorum auctores, qui lingua latina de trichosi scripserunt, simpliciter plicam ut Słowacki et Starnigelius, nominabant. Praeterea magnam aliorum nominum multitudinem habemus, ut cirragram Polonorum, capillicum intricatum; comam Caesaream, rapalosin (apud Lineum, Vogel); trichoma (apud Manget, Cullen); chiragram (apud Pupke); tricas in cul eorum (apud J. Frank) etc. Sic alia Germanica vetera nomina sunt *Sellentost* in regionibus Rheni, *Trudenzopf* in Saxonia, *Klattern* in circulo thornensi, hollandicum *Hairelegt*, anglicum *elf locks*, elvish *krots*, rossicum *ко́лтунь*, bohemicum *koltaun* etc. Nomen plicae polonicae ab Agricola, Zeidler, Gehema in linguae usum introductum, quamquam minime aptum, tamen usitatissimum ad hunc diem conservatum est. Id, si quidem morbi originem designare vult, falsum est, quoniam quemadmodum infra videbimus, rhenica affectio Marenflechte, polonicis kołtun et gwoździec, qui morbi iidem sunt, aetate praecedit. Neque satis apte plicae

polonicae nomen, sicuti alia, quae jam attulimus, rem significat, quoniam iisdem appellationibus et morbus universalis et intricatio localis capillorum notantur, quorum distinctio tanti momenti est. Nos, quo melius quaeque rerum confusio evitaretur, diversis *Nomina nominibus* morbum ipsum et morbosam capillorum intricationem *a nobis electa*. internoscere studuimus, verbo „trichoseos“ pro priore „trichomatis“ pro altera re adhibitis. Neque tamen, ea appellatione non omnibus rationalis designationis postulatis satis fieri, negare possumus, quum id, quod nomini significari credas, trichosis non ubique necessario cum trichomatica capillorum intricatione intret. Quum autem haec intricatio, siquidem adest, tam characteristicum morbi phaenomenon sit, nos, meliore verbo deficiente, novo vocabulo et singendo appellationum turbam augere non conati sumus.

De patria et propagatione morbi haec memorare possumus: *Notitia priusquam primam de morbi existentia in Polonia cognitionem morbi historica*. scriptis accipimus ab Oczko¹⁹⁾ p. 127, Syreński (ibidem), Ciachowski (ibidem) exaratis et postea litteris *Starnigelii*¹¹⁾ p. 333 rectoris universitatis zamoscensis ad professores paduanos missis, quibus de vehementi trichoseos per Polonię propagatione conquestus, eorum consilium opemque implorat; morbus jam ante in Brisgavia, Alsatia, Belgia, in terris superiori Rheni parti adjacentibus ut endemicus sub nomen Marenflechte et Schroetlingszopf notus fuerat, cuius accurateorem descriptionem Schenk¹⁹⁾ p. 6 exhibet; morbum novum et insolitum esse dicens. Nam Oczko¹⁸⁾ p. 127 in suo opere a. 1581. Cracoviae edito, disertis verbis morbum „kołtun“ vel „gwoździec“ decem ante annos primum in rubra Ruthenia idque in terra inter fluvios Bystrzyca et Czeremasz interjacente apparuisse ait, in cuius oppidulo „gwoździec“ ejusdem nominis morbum primum natum esse refert. Quum autem, uti verissime Lessingius¹⁰⁾ p. 445 adnotat, idem scriptor Oczko in altero libro a. 1578 in lucem emisso, jam prius opusculum suum memoret, quod ideo antea jam typis expressum extitisse certum est; prima trichoseos in rubra Ruthenia existentia, post annum 1570 constitui non

potuerit. Quoniam autem Schenk, qui a. 1584 de trica seripsit, homines a se visos esse dixit, qui per totam suam vitam trichomata haberent, si fere eos homines saltem 35 annorum fuisse assumimus; tricam ab hoc viro descriptam fere 25 annis polonicae plicae aetate praegressam elucet. Utrumque morbum vero eundem esse ex comparatione descriptionum a Starnigelio et Schenkio exhibitarum non difficile est intelligere. Addo descriptionem ejus morbi a Petricio anni 1635, in latinam linguam conversam, quae ad verbum expressa invenitur apud Oczapowski opusculi⁶⁾ p. 163.

plica apud Starnigelium a. 1599.

... eveniebat ut plerique hominibus unus et alter cirrus excresceret cum vicinis sibi crinibus inde introrsus implicatus et densus. Et tum quidem nulla re molestus erat. Si crines radantur humor ille et virus in corpus relabitur, caput, pedes, manus, omnes artus omnes partes excogitat. Experatum est, qui tales fasciculos implicatorum crinum deraserint eos oculis capi aut defluxibus ad alias corporis partes gravissime torqueri.

trica apud Schenkium a. 1584.

Horridum quoddam impexum, adeoque intricatum capitum atque barbae capillium... quo affecti praelongas capillorum tricas et cincinnos mirifice intricatos videas... quos illi magna religione nec ferro praescindere, nec petiente explicare sustinent; persuasi omnino gravissima capitum morborum fomenta, velut apoplexiae, paralyseos, maniae et comprimis cephalgiae pertinacis consilium materiam iisdem alendis absumi.

kołtun apud Petricium a. 1635.

... humor coltunicus, plerunque a capite initio capto, dum ex capite nondum exsudatus, in capillos non transit doloribus caput perforantibus cruciat; epilepsiam, spasmos manuum aliorumque membrorum progignit. A capite usque ad articulationes progreditur, donec per cutis capitum poros emisus, cum capillis conglutinatus, doloribus remittentibus, nodos et restes efficit.

in Saxonia, quod etiam pleraque nomina, quibus morbus in diversis Europae regionibus appellatus est, probare videntur. Atque ideo Rosenbaum²⁰⁾ p. 291 trichosi originem Germanicam vindicare studet.

Praeclaris de trichosi investigationibus a Weese¹¹⁾ p. 304, Chłędowski¹⁸⁾ p. 127 et rursus a Weese¹³⁾ p. 47 nec non ante eum a cl. Raisin²¹⁾ p. 127 institutis, accuratissime, trichoseos originem in Polonia demum ad saeculum decimum sextum referendam esse, demonstratum est. Inde vetusta opinio Pastorii, qua ea tempore Tartarorum in Polonię incursionis initium habuisse credebatur, omni adminicculo caret; adversus quam etiam episcopus Skuminowski, supra memoratus, in litteris ad professorem Lovanii Plempium datis, jam diu adversarius coortus est. Omnes ii, qui inde a Pastorio usque ad Oczapowski locis historicorum Cromer et Długosz apud Pastoriū citatis confisi morbum eo, quo Tartari suum incursum fecerunt, tempore originem habuisse putant, magno et vehementi errore tenentur, quum praesertim neque Cromer²²⁾ p. 237, neque Długosz²³⁾ p. 830 locis allatis ullo verbo mentionem trichoseos fecerint, sed tantum epidemiam describunt, quae tempore belli annis 1285—1288 aqua potabili a Tartaris veneno infecta cooperit. Sic Długosz l. c. diserte ait: „ingens pestis et mortalitas in plerisque Rossiae (i. e. rubrae) terris invalescens plurimos mortales in sexu utroque extinxit“ et porro „ut subito procumbentes nullis antidotis profectum afferentibus relevati, occiderint.“ Pariter rerum scriptor certissimus Naruszewicz²⁴⁾ p. 182—185 tantum de epidemia tempore quo Tartari impetum fecerunt saeculo decimo tertio orta loquitur, neque vero de morbo, quem Pastorius cum suis asseclis plicae nomine ab beneficiis eodem saeculo in rubra Rossia exortum esse dicit. Non magis in loco Spondani ab Oczapowski laudato⁶⁾ p. 17 ulla trichoseos mentio reperitur, sed rursus epidemiae descriptio. — Pariter opinio eorum, qui morbum per Tartaros transportatum esse ajunt nihil defensionis habet, namque si ea vera esset morbus Tartarorum

vestigia pressisset. Verumtamen apud rerum scriptores appelloatos (Crom.²²⁾ p. 255 et 256, Dlug.²³⁾ p. 846 — 850, Naruszew.²⁴⁾ p. 182) Tartari primum per terram lublinensem, tum per Podlasiam, Masoviam, denique per Sandomiriam et Sradam atque cracovienses terras effusi, tum demum, cum Poloniā relicturi erant, in Rossiam rubram venisse narrantur, quae terra tamen ab Oczko, Starnigelio et ceteris consensu ea appellatur, in qua primum trichosis apparuerit. Inde in Podoliā aliasque Poloniae provincias, ad ultimum in regionem urbis Zamoscii venit, ubi quidem antea non cognita tribus saeculis post primum visa est. Id quoque contra eos jure videtur dici posse, quod trichomata quemadmodum memoravimus in Tartaria nulla sunt, et secundum Oczapowski Poloni, qui in Caucaso stipendia faciunt trichomatis liberantur, neque qui in Polonia stativa habent Tartari eo malo laborant. Neque ullo modo fulciri potest sententia Schlegeli⁸⁾ p. 104, qui morbum saeculo undecimo ortum ratus, Casimirum I, cum monachus ad regnum escendisset civibus suis, ut capita raderent, imperasse dicit, qua re locali capillarium follicularum irritatione capillorum affectionem et inde trichomata provocata esse censem. At primum rex Casimirus monachus regnum non obtinuit²⁴⁾ p. 265, deinde mos capillos radendi gestandaeque togae quantum quidem memoria repeti potest longe antequam Casimirus rex fieret, ut mos Orientalium proprius, per Poloniā pervulgatus fuit.

Ex factis supra allatis, trichosim non propagatione epidemica a Polonia in Rheni regiones transferri potuisse appareat, quippe quae priusquam in Ruthenia rubra innotesceret, ad Rhenum exstaret, multo ante annum 1599, quum tanta cum vehementia in Polonia apparuit. Quo accedit, quod morbi ex Polonia ad Rhenum propagationem vix Schenkiūm praeterisse credi potest, qui¹⁹⁾ p. 6 diserte haec ait: „europaeis aliis innotuisse hoc capillorum vitium nondum comperi“ et porro „quasi endemicum et popello nostro notum est satis; cives hic ipse novi supra triginta,“ quibus verbis exiguum numerum trica laboran-

tium certius designat. Tum etiam terrae inter Poloniā et Rhenum intermediae epidemia ista non pepercisset, neque ejus temporis viri docti de ea re silerent. Non magis morbus a Rheno epidemica propagatione in Poloniā transportari potuit, quoniam ea morbi forma, quae antea ad Rhenum exstabat, primum in Rossia rubra speciem affectionis rarae et mitis, secundum scriptorum consentiens testimonium, p̄ae se tulit. Verisimile² esse possit, illius aevi genio epidemico, qui maximam ad sanguinem dissolvendum inclinationem ostendebat et epidemia petechialis typhi eodem tempore in Polonia dominante, de qua Oczko refert, vehementique syphilidis propagatione, ob inauditam, ut Chłędowski ait, morum corruptelam sexusque foeminini libidinem orta, morbum forma adhuc rara et miti hic illic, ut ad Rhenum et in Rossia rubra, obvium, sola in Polonia epidemicum ea aetate factum esse; id quod ex ejus descriptione ab Starnigelio exhibita patet¹¹⁾ p. 334 „nunc serpere coepit hic morbus et late per totum regnum Poloniae, magno omnium malo, magnoque cruciatu divagatur“. Possunt quidem ex artis medicæ historia exempla proferri, quibus morbi rari levioresque rebus sibi propitiis re vera epidemiae indolem induisse cernantur. Cur autem is morbus, primaria patria ad Rhenum mox relictā, Poloniā inde maxime sedem sibi delegerit, id ad hunc diem vix certo constitui potuerit. Opus quidem est, ut certae endemicæ res commodum iis ad propagationem solum p̄aebeant, at subtilioris rei investigationis erit, hae res quales sint, perscrutari.

Ex omnibus, quae adhuc proposuimus sequentia consequi *Conclusio* videntur:

- 1) Trichosim neque ab syphilide, nec a lepra aut arthritide derivandam esse.
- 2) Trichoma nec illorum morborum endemicam formam, neque variarum, vel acutarum, vel chronicarum affectionum crisin endemicam habendam esse.

- 3) Eos, qui dyscrasiam trichomaticam assumpserunt, ejusdem originem tamen ex quibusdam endemicis influxibus nondum satis explicasse.
 - 4) Quamquam permagnam copiam nominum habeamus, quibus morbus designetur, nullum tamen satis aptum judicandum esse, quoniam discriminis, quod est inter trichosim morbum et capillorum intricationem, justa ratio non habetur.
 - 5) Trichoseos in Polonia remotissimis temporibus existentiam adhuc nullo argumento probari posse.
 - 6) In regionibus ad Rhenum sitis, Marenflechte, vetustate polonicis kołtun et gwoździec praestare, qui morbi inter se non differentes a nobis trichoseos nomine dicti sunt.
 - 7) Nullam causam esse, cur trichosis epidemica propagatione a Reno in Poloniam vel vice versa transportata credatur; sed verisimile esse eam in Rheni regionibus et Rossia rubra ut morbum endemicum et in aliis Europae regionibus sporadicum exstisset, in Polonia ob res secundas saeculo decimo sexto epidemicam factam, hodie ibi tantum endemicam manere.
-

Pars secunda.

Imago trichoseos et trichomatis eorumque definitiones. Microscopicæ et chemicæ tum aliorum tum meae ipsius investigationes et conclusio inde facta de modo quo trichoma fiat.

His, qui trichosin pro morbo sui generis habent, non sine causa criminis datum est, quod nulla ejus peculiaris symptomatologia, nulla certa imago proponi posset. Plerique scriptores — paene omnes insimulare maluerim — in trichosi ut morbo *cur ad hunc diem nulla morbi imaginis proposita sit.* describenda id erroris in se admiserunt, quod trichosin, quae jam per se varias animalis organismi telas, systemata et organa afficere potest, ab affectionibus cum ipsa complicatis, quae ad trichoseos eruptionem adjuvandam, in hominibus eo jam proclivibus plus minusve valere possunt, non eo, quo par et aequum est, modo disjunxerunt. Alterum eorum vitium in eo consistit, quod alias affectiones, dum trichosis, quae plerumque chronicum decursum offert, adest, comites se illi addere posse, non satis reputarunt. Denique fallacibus externis signis veri trichomatis innixi, id ab artificio non satis subtiliter discernere sciebant, quod tanquam arte factum, in quibusvis morbis, praesertim in inferioribus populi ordinibus, extare potest, qui observatione, qua saepius trichomate efformato varios morbos conticescere

cernebant adducti, praesumta opinione de salutari et critica vi capillorum intricationis commoti, in omni affectionum genere, quolibet modo ultro inquinando, non pectendo, capite sovendo, sudore de industria provocando, et aliis rebus trichomatis formationem adjuvare studebant. Inde evenit ut capillorum perturbationes in diversissima rerum conditione in omnium acutarum et chronicarum affectionum decursu se excolere cernerentur, vel jam exculta invenirentur, unde non mirum, quod cum omnibus morborum generibus, quibus humanus organismus obnoxius est, trichosis confusa fuit. Inde verum chaos exortum est, vera intricatio in symptomatum trichoseos enumeratione. Ignoratum est, quid trichosi, quid rursus aliis cum ea complicatis vel casu cum capillorum perturbatione conjunctis morbis proprium esset. Itaque non mirabimur si Lebrun²⁵⁾ p. 46. plerosque medicos narrat, quum trichoseos descriptiones legissent, innumerabili symptomatum multitudine oneratam, morbum pro altero Proteo habuisse, qui, quotquot cogitari possent, formas sibi indueret. Tempore adeo recentissimo medicus doctus Kułakowski²⁶⁾, cui quidem saepenumero ut trichosin observaret contigit, eum morbum dicit proteiformen. Neque vero reapse sic est. Propriam sibi originem, proprium decursum, proprium exitum vindicat trichosis, denique, ut paucis absolvam, certa morbi imago non deest. Nam, quamvis manifestationes ejus perquam variae sint, in omnibus tamen indoles specifica inest, qua morbi formae soli trichosi peculiares esse cognoscantur. Praecedens organorum digestioni inservientium et processus assimilationis affectio; peculiaris variarum secretionum et excretionum natura, materiae propriae in organismi telis depositio, sanguinis e vena emissi atque ex vasis haemorrhoidalibus excreti qualitas — omnia ea phaenomena, quae in trichosi longius breviusve tempus extante observari solent — dyscrasiam naturam morbi satis demonstrant, qui in assimilationis organis radices suas exigit. Nec tamen, in quo ea dyscrasia consistat, exponere conabimur, quoniam non magis ea, quam aliarum dyscrasiarum

natura nobis patet. Igitur trichoseos phaenomena morbosa maxime conspicua complexi, quae in iis characteristicā insunt extollere, eoque modo claram morbi adumbrationem constituere, studeamus. Simul vero, quod pathologica anatomia morbi chemicae et microscopicae productorum investigationes ad hoc usque tempus fere nullae exstant, vehementer dolemus, neque nobis ad morbi imaginem perficiendam cultrum, retortam et vitrum amplificans, quorum in multis aliis morbis tam splendidus fuit usus, eo, quo dignum erat, modo uberius in auxilium vocare licuit.

Trichosis maxime significatur: 1) malo assimilationis ^{characteristica trichoseos in dividenda.} prae-
grediente; 2) inclinatione ad morbosam materiam ipsi specificam informandam, et saepius trichomate apparente; 3) specificis affectionibus hujus materiae formationem sequentibus, quibus variae telae, systemata et organa animalis organismi tentantur.

1) Initium morbi solito a variis perturbationibus digestio-
nis et assimilationis incipit, nervorum et sanguinis systemate magis minusve participi. Quae perturbationes, quum nondum quidquam conspicui characteristicique offerant, vulgo et ab ae-
grotis et a medico, incusatis plerumque gastrismo, perfrictione,
nervorum interturbatione etc. praetermittuntur, donec tandem specifica trichomatica manifestatio intrat.

2) Quod trichosi maxime characteristicum est, in eo con-
sistit, quod ea, semel exculta, quancumque formam, quancumque sedem et decursum habet semper inclinationem ad specificam morbosam materiam, quam nos trichomaticam dicimus, forman-
dam ostendit. Quae materia vel organis, solito crisin peragentibus secernitur, et morbi processu evanescente, materia ista funditus remota, morbus evanescit, vel, si variis turbationibus influxibusque infestis in excretione naturali prohibita fuit, in alias telas, sys-
temata organaque transgressa aut repulsa, ibi specificas tricho-
maticas affectiones provocat. Haec trichomatica materia, ex quibusunque organis secernitur, peculiarem, foedum odorem emittit, qualis fere ex lardo rancido vel putidis carnibus effun-

ditur⁶⁾, p. 530⁵⁾ p. 45²⁵⁾ p. 17. Neque solum materia cute et tubo intestinali excreta eum odorem retinet, sed etiam in lochiis²⁸⁾ p. 35⁶⁾ p. 499 et expectorationibus²⁷⁾ p. 446⁶⁾ p. 498 et 500; quin adeo sanguis ex vena trichomatici missus, si ad gradus 40—50 R. calefactus est⁶⁾ p. 188, nec non sanguis ex vasis haemorrhoidalibus eorum, qui trichosi laborant, editus eundem odorem effundit⁷⁾ p. 351. Is odor, quamquam magis minusve organo secretorio vel excretorio mutari possit, commune tamen volatile, foetidum, olens principium continet. Consistentia quoque et color ejus, quamvis organa, ubi deponitur vel ex quibus seceruntur, quasdam mutationes producere possint, non tamen facile ignorari potest. In cute ex. g., et in vasis lymphaticis, sub periosteo et in cavo articulorum extremitatum subflava albida spissa materia cernitur. Ejusdem gravitas et vis pro organorum diversitate ex quibus ejicitur vel in quibus ut morbi productum deponitur aut pro complicationibus, quas praecipue cum aliis morbis dyscrasiciis magis minusve ineat, variare potest. Praeterea hoc proprium est trichomatico deposito, quod perquam raro in regione circumjacente inflammationes anatomicas sed ad summum hypertrophiam et emollitionem telae provocat⁶⁾ p. 203. Tempore progrediente ea depositio in tela, ubi apte deponi potest, conglomerationes duriusculas, in tactu lardosas, intus non organisatas efficiens, crassior et spissior evadit; denique post longius tempus compressione tantum et pondere alias organicas mutationes in locis circum sitis provocare potest⁶⁾ p. 272 et 289,²⁸⁾ p. 42.

a) cute excreta materia trichomatica id sibi proprium, in nullo alio morbo inventum vindicat, quod capilli ea contacti non solum in aegrotis, sed etiam non raro in sanis hominibus non ita multo post intricari incipiunt, i. e. tantopere inter se perplacari, ut neque pectendo neque luendo distrahi possint. Vir de trichosi pertractanda optime meritus, cuius liber recentissimo tempore indefessa diligentia sollerter et proprio judicio exaratus, quamquam insunt, quae auctori

peculiaria sint, tamen ob insignem veritatem magnamque novarum observationum copiam prae ceteris maxime excellit, Dr. Oczapowski Varsoviae, decem casus ab ipso observatos nobis describit, ex quibus sanos etiam alienos capillos cum trichomatica materia in contactum adductos in verum trichoma transgredi posse cernimus⁶⁾ p. 456 et 507. Apud cl. Szokalski quoque talia exempla proferuntur⁷⁾ p. 339. In locupletis bene moratae e Lithuania oriundae, trichosi laborantis matronae, quam mihi Petropoli nosse contigit, filia duodecim annos nata, quum ob cerebri inflammationem, quae exstisset videbatur, hirudinibus ad occiput appositis vulneri spongia tepida aqua imbuta imponeretur, crines sanguine sudoreque repleti eum in modum circa spongiam intricati sunt, ut ea in medio trichomate remanens inde removeri nequiret. Mater, femina opinionibus praejudicatis libera et maximae fidei, saepius rem ita se habuisse mihi affirmavit. Sunt etiam exempla, quibus capillos tempore exhalationum cutis desectos, neendum intricatos ipsos per se implicitos esse cognoscamus⁶⁾ p. 218. Lafontaine²⁹⁾ et Oczapowski⁶⁾ p. 232 saepius sanos et alienos capillos cera ad trichomaticos affixos in trichoma mutatos esse viderunt. Satis notus etiam polonici populi mos est, quo, ut ante efformatum trichoma, ad sitne trichosis, sibi persuadeant, cincinnos proprios desectos in scrobiculo cordis aliquantum temporis secum ferre solent, qui si intricantur, morbum in corpore exstare, certum est, id quod observandi Lafontaine, Chromy et Oczapowski aliquoties occasiones habuerunt. Ea facta, ad quae alia etiam addere possum trichomaticae materiae proprietatem capillos nulla folliculorum affectione praegressa intricandi monstrare possunt. Haec intricatio, ea materia agente, tam celeriter evenire potest, ut quamvis perpetuo capilli pectantur⁶⁾ p. 212⁷⁾ p. 346, vel aliquot post horis⁹⁾ p. 26, vel una nocte⁵⁾ p. 45⁷⁾ p. 343 implicentur. Eadem non solum in capite sed in omnibus aliis,

quae pilis teguntur, locis, uti in barba, sub axillis, in pectori et genitalibus, quamquam non ita saepe, occurrit. — Trichomatica materia cute excreta, solito spissa et viscida est, coloris subflavi, albidi, persaepe admodum profusa. Oczapowski⁶⁾ p. 171 phosphoricum ejus splendorem obser-
vassse sibi videtur. Viscida natura ejus tanta esse potest ut uno in casu, quem J. Frank¹⁾ p. 520 affert, Judaei cu-
jusdam mitra materia exsudata cum capillis tam conglutinata sit, ut a capite amplius detrahi nequiret. Odor ejus tam acer est et volatilis, ut omnes vestes strataque lecti im-
praegnet et tam specificus³⁰⁾ p. 417, ut qui trichosi labo-
rant facile inde cognosci possint. Neque id mirum quum alii etiam morbi, veluti scarlatina, morbilli etc. exercitato observatori specificie olementem exhalationem offerant. Trichomatica cutis exhalatio solito critica est.

- b) Si materia trichomatica tubo intestinali secernitur, alvis subviridis flava, pici liquidae non dissimilis, odoris tam acris et peculiaris est, ut adeo extra domum⁶⁾ p. 188 et 500, ²⁸⁾ p. 25, trichomatica esse cognoscatur. Illae liquidae trichomaticae alvi evacuationes adeo complures per menses durare possunt, aegroto tamen non admodum debilitato⁶⁾ p. 300, quoniam perraro ulcerum formationem sed tantum hypertrophiam telae submucosae tubi intestinalis et ne eam quidem semper provocare solent, id quod in earum interpretatione non parvi momenti est. Hae trichomaticae tubi intestinalis exinanitiones, pariter atque trichomaticae cutis exhalationes criticam vim habere pos-
sunt; ita ut trichosis, trichomate non formato, hac materia prorsus expulsa evanescat; cuius generis viginti morborum historias Oczapowski enarravit⁶⁾ p. 534.
- c) Materia trichomatica renibus excreta urinam turbidam, spissam, jumentosam reddit, in qua sedimentum magnum plusquam dimidiam excreti liquoris partem continens, minus rubrum, minus ad vasorum parietes adhaerens, neque in

tactu tam asperum, quam arthriticum formatur⁶⁾ p. 168;
⁷⁾ p. 336 ⁵⁾ p. 32; ¹⁾ p. 319. Ejus urinae odor minus acer, proprie tamen ab urina sani vel alio malo laborantis hominis differt. Trichomatica urinae excretio longius per tempus extans trichoseos lysis evadere potest.

- 3) Si igitur criticae cutis tubique intestinalis excretiones vel trichomatica urina, quae pro lysi intrat, suppressuntur vel materia iisdem non tota tollitur, vel quadam aliorum organorum ad affectiones praedispositione ad aberrationem impellitur, varia nervosa et inflammatoria phaenomena cum respondente systematis sanguinei reactione iis in organis, quae crisi vel lysis in se suscipiunt, suscitar possunt, vel alia systemata orga-
naque specie affectionis nervosae vel inflammatoriae coripi⁶⁾ p. 172 et 187. Maxima ad affectiones praedispositione tempore trichomatici morbi processus telae fibrosae excellunt, praesertim dura mater cerebri⁶⁾ p. 492; ²⁸⁾ p. 12 et medullae spinalis¹⁴⁾ p. 17; ¹⁾ p. 519; ⁵⁾ p. 38; tum ossa⁶⁾ p. 283; ²⁸⁾ p. 6 articulique¹⁴⁾; ⁵⁾; ²⁸⁾; nec non interdum, sed rarius viae aeriferae²⁷⁾ p. 446, et membrana mucosa genitalium⁵⁾ p. 35; ⁶⁾ p. 198; ²⁸⁾ p. 26. In superficialibus glandulis vasisque lymphaticis plerumque duritiem producit⁶⁾ p. 250; ²⁸⁾ p. 12. Interdum inveniuntur unguis degeneraciones⁶⁾ p. 297; ⁷⁾ p. 330; ¹⁹⁾ p. 6. Omnibus his affectionibus, sive nervosa natura sive inflammatoria, acuto vel chronicum decursu existunt, peculiare hoc est: a) quod semper proclivitas ad trichomaticam materiam propellendam ostenditur, qua tota excreta, nova formatione absoluta, sanitas subito, etiam ubi spes valetudinis restituendae omnino omissa erat, intrare potest; b) quod omnes eae affectiones, neque ubi inflammatoria specie apparent, antiphlogisticis et derivantibus remediis, neque ubi neuroses formam induunt, narcoticis, nervinis et specificis tolluntur, sed trichomatica crisi aut lysi solitis organis intrante conticescant⁶⁾ p. 187, 190, 199, 202, 495 et 500; ³¹⁾ p. 207. c) quod trichomatica inflammatio plerumque homines imbecillos,

nervososque sibi victimas deligit, neuroses trichomaticae robustos et plethoricos. Sic maxime mirabile videtur, simplicem rusticum populum hypochondricis ⁵⁾ p. 202; ²⁸⁾ p. 19; ³²⁾ p. 59 et hystericis ¹⁾ p. 517; ¹⁵⁾ p. 24 affectionibus non carere.

Decursus variarum earum affectionum vel nervosarum vel inflammatoriarum aut acuta forma, quae rarer est, aut solita chronicā apparet; et quemadmodum dictum fuit, crisibus cute et tubo intestinali vel lysi urina factis resolvitur, vel ubi istae aut deficiunt totae aut non satis sunt, aut individualis predispositio quorundam organorum systematumque adest, in affectiones memoratas transit, vel ibidem degeneraciones, trichomatica materia deposita, sequentibus organicis texturarum commutationibus provocat, quod in exceptis trichosi ipsa primitus, sed vulgo aliis complicationibus cum dyscrasia syphilitica scrophulosa aut carcinomatosa evenit.

Febres comitantes, id quod ab trichoseos acuto decursu localique affectione dependet, magis minusve inflammatoriae sunt, aut rheumaticae vel gastricae, quae omnes nisi trichomaticis crisibus intrantibus resolvi nequeunt. Interdum motus febriles deesse possunt, quae res variis individualibus rationibus modoque orientis affectionis decernitur. Morbo diutius durante merus

Desan- cachecticus status evolvi potest, qui organicis affectionibus eodem *quine tri-* tempore praesentibus hectica febri et hydrope succedente mortem *chosi la-* afferat. *Sanguis* talium trichosi laborantium cachecticorum con-*boranti-* sensu a cl. *Słowacki*, *Saxonia*, *Petricio*, *Scultet*, *Oczapowski* speciem flocceam prae se ferre dicitur. Placenta sanguinea celeriter deponitur, friabilis est, cui spuma ex tenuibus filis et floccis imponitur. Serum maxime auctum, subflavum viscidumque et materiae trichomaticae in variis organis depositae non dissimile, alcalice reagit, odoremque trichomaticum spargit, praesertim, cum calefactum est. Cruor magis subflavo ruber larga copia ad fundum descendit. *Sanguis* etiam ex vasis haemorrhoidalibus emanans odorem trichomaticum emittit.

Eam perpetuam elaborationem et expulsionem trichomaticae

materiae nec non peculiarem affectionis provocatae naturam si ante oculos habueris, trichosis facile a comitantibus forte vel conjunctis affectionibus dignosci poterit.

Jam ista rejicienda est opinio quasi vero trichosis sine *De trichomate* trichomatis efformatione apparere et resolvi nequeat. Trichomaticas tubi intestinalis excretiones pro crisibus et trichomaticam urinae excretionem pro lysi intrare et, morbi processu desinente et trichomatica materia perfecte remota, trichosis sine capillorum intricatione resolvi posse vidimus. Quum autem trichosis cutis etiam exhalationibus saepe resolvatur, quibus trichomata formantur, rude vulgus, quemadmodum jam diximus, ad trichomatis formationem, tanquam ad phaenomenon maxime conspicuum, quo existente tam variis trichomatici labores desinant, prae ceteris animos suos convertit, in cujusvis generis morbis omni modo capillis intricandis verae trichomatomaniae indulgens, unde multitudo trichomata gestantium, ad innumeram copiam adaugetur. Et numerus eorum, qui secundum *Beschorener* a. 1840 inter magni ducatus Posnaniae incolas 1,233,850 summam explebat 460, anno proximo subsequenti 858 et a. 1842 additis 585 increvit. Quum autem borussicus magistratus tali numero exterritus incolas Posnaniae censeri et inspici jussisset, inter 231 incolas unum semper trichoma habere inventum fuit. Totius numeri vix nonam partem oppidanii efficiebant. In solo circulo thornensi sicuti *Weese* monstrat ¹³⁾ p. 6. a. 1843 ex toto numero incolarum 44,906 trichoma gestantes 1034 numerati fuerunt i. e. inter 43½ fere unus. In iis qui oppida tenebant ratio 1:375₂₅; in incolis ruris ratio 1:34½ reperta est. Eae rationes a cl. *Beschorener* et *Weese* prolatae ingeniorum cultura minore, numerum trichomata habentium mirum in modum augeri luculententer docent. Quod autem viri docti modo appellati soli capillorum cultui neglecto trichomatum formationem adscribendam esse ajunt, id praeter ea, quae supra attulimus, aliis etiam compluribus observationibus impugnari posse videtur. Ipse in familia satis diviti tres trichosi et

trichomate affectos vidi, in qua tamen summa ubique munditia servata, feminae adeo vanitatis crimine liberae non essent. Itaque rationes a Beschorener et Weese prolatae in infimis vulgi ordinibus, ubi plurimum superstitionis et opinionum praesumptarum inveniatur, trichomatomaniam creberrimam esse probant, et hic maxime populo edocendo multitudinem trichomata habentium haud parum diminui posse crediderim.

Diagnosis trichomatis verae. Jam quo modo verum trichoma a spurio distingui possit quaeritur? Externis indicis si institeris, non semper internoscere contingit, praesertim si vetus trichoma multum decrevit sordibusque obsitum est. In constituenda diagnosis phaenomenorum tum comitantum tum praegressorum nec non modi et celeritatis intricationis rationem habere gravissimum erit. Quod omnium primum ad externam veri trichomatis speciem attinet, id, siquidem recens est h. e. nondum maturum, massam compactam stricte capiti adhaerentem efficit. Haec massa ex capillis inter se variis flexionibus perturbatis consistit, inter quos et ad quos materia subflava spissa viscida sedet. Trichoma longius progressum, si excretio ex capitis cute cessavit, ea flava materia siccata, duriusculum evadit et sanis capillis accrescentibus a capite recedit. In recentibus trichomatis odor foedus, volatilis, subacidus sponte, in trichomatis non ita inveteratis post trichomaticam materiam aqua maceratam calefactamque evolvitur. Capilli recentis trichomatis plerumque fusciores coloris, quam sani crines ejusdem hominis apparent, vetustioris autem minus intensi coloris. Gravissimum in trichomatis est alia phaenomena comitantia considerasse. Celeriter si evolvitur trichoma, motus febries magis minusve vehementes praecedere solent, qui cum specificis cutis exhalationibus, quum trichomatis formatio futura est, vel paulatim vel celerius evanescunt. Eodem tempore capitis affectiones praevalent, in quibus dolores sensu quasi clavus capiti infigatur similes summum cruciatum producent. Capitis dolores universalibus reactionibus respondentes inflammatoriam naturam induere possunt; quibus inflammatorii

affectionibus non antiphlogosi⁶) p. 187, sed trichomaticis crisibus plerumque trichomatica materia ex capitis cute exsudata resolutis, capilli, formis figurisque perquam mirabilibus, quae tamen a fortuitis momentis pendent, satis celeriter (v. sub a.) intricando trichomata fiunt. Quae capillorum intricatio vel tota capitis superficie vel in singulis partibus⁵⁾ p. 37; ⁶⁾ p. 180, primum semper in capillis capiti cuti prioribus¹⁾ p. 523; ⁶⁾ p. 241; ⁹⁾ p. 43; ³²⁾ p. 86, postea quoque in liberis finibus evenit, vel aliis crisibus secutis trichomatis formatio non succedit. Alia phaenomena ut dolores spinales artuumque nihil singulare, quod aliis affectionibus adscribi nequeat, ostendunt. Sin autem de repentina capillorum intricatione, terrorem vel animi iracundiam secuta dicuntur, tum quidem trichosis jam adsuit et causis commoventibus tantum trichomaticae materiae exsudatio in capitis cute efficitur, quo facto capilli longiore vel breviore temporis spatio implicari inter se possunt. Si vero trichoseos decursus magis chronicus est, materiaeque trichomaticae elaboratio et excretio, sicuti plerumque fit, diutius continuatur, cutisque exhalationes trichomaticae, si quae adsunt, eundem chronicum decursum, interdum per menses, annosque ¹⁾ p. 515; ⁵⁾ p. 43, saepe totam adeo per vitam, cum breviribus vel longioribus intermissionibus durantem, habent, tum quidem morbosa excretione repetita, trichomatis quoque formatio ex sanis capillis, qui postea tempore libero procreverunt, redintegriatur.

Haec trichomatica excretio, phaenomenaque praegredientia ad verum trichoma formandum omnino necessaria habentur, ad quod quidem principium, si omnes, quod Beschorener et Weese enumerant, trichomata habentes, vel permultos in polonicis provinciis occurrentes, percensere licuerit, eorum numerum non parum imminutumiri, dubitari nequit.

Contra in spuriis trichomatis capilli in liberis finibus perturbari incipiunt, ad caput versus mobiles manentes. Postea demum, cutis capitis exhalationibus auctis et adjutis, sudor

incrassatus inter capillorum radices depositus, totam capillorum copiam in unum conglomerare potest, qui tamen lavando pectendoque in pristinum ordinem restituuntur: neque vero in genuino trichomate. Id spurium trichoma plerumque tardissime formatur et cum alienis fortuito admixtis rebus, quae in vero recentique trichomate paucae inveniuntur, conglomeratur. Phaenomena autem formationi praecedentia tam specifica et capitis exhalationes trichomaticae hic prorsus desunt. Ejus modi trichomate desecto, capitis quidem perfictio, nunquam vero trichomaticae exhalationis suppressio provocari potest.

Ratio, trichosi cum trichomate intercedens. Quod inde ad rationem, quae trichomati cum trichosi intercedat, attinet, mihi quidem ut criticam rationem invenirem nunquam contigit; sed omni in casu, si quidem eam viam morbus ingressus est, resolutionem cutis crisibus, magis minusve perfectis, factam vidi. Praeterquam quod capillis pro sua structura facultas crisin suspiciendi prorsus deest, qualis aliis organis efficitur, malas sequelas, ex trichomate nondum maturo desecto exortas, tantum ad criticas excretiones oppressas capitique perfectionem referre licuerit. Qua in re virorum probatae fidei sententiae, qua in capillorum intricatione crisin inesse volunt, euidem adsentire nolim. Trichoma nisi maturum fuerit, i. e. nisi sani capilli procreverint, vel, ut aliis verbis utar, trichomaticae materiae ex ente capitis excretiones deserverint, sine affectionum periculosisissimarum adventu, desecari non posse, factis satis constat. Si trichoma, quo tempore exhalatio ista perdurat, desecatur, capiti calidum tegumentum detrahitur, quod num ullo artificio compensari possit dubites. Facile pro summa partis trichomaticae materiae volatilitate, cuius omnino in trichosi non mediocreis gravitas videtur esse, perfectione orta, materiae illius excretio supprimi possit. Trichoma jam maturum desectum perfectionem quidem, neque tamen trichomaticas affectiones subsequentes producere potest. Trichomatis formationem euidem non judico nisi quendam fortuitum actum esse, peculiari materiae capillos intricandi facultate,

quam nos quoque sanis et alienis capillis ea materia humectandis imitari possumus, provocatum.

Ex his factis modo commemoratis notio quoque de contagiosa materiae cute excretae natura consequitur, neque tamen alio sensu, quam quod sani capilli, trichomatica materia contacti, intricando trichomata existunt. Inde autem trichosin evolvi posse, id quod observandi cl. Oczapowski aliquoties⁶⁾ p. 87—92; occasiones habuit, tum solum concedi queat, si homines quadam ad trichosin praedispitione praediti morbi impetui celerius succumbunt. Facta autem ejusmodi tam singula et rara exstant ut conclusionem ex iis fecisse, temerarium videatur. Hereditate autem eum morbum propagari, hac re intelligi possit, quod in infantibus recens natis trichosis occurrit; omninoque primae pueritiae tempore ab anno primo usque ad quintum¹²⁾ et¹³⁾ tam frequenter obvia est. Oczapowski quidem, tum vaccinatione lympha ab infante trichomatico sumta, tum nutrientium lacte morbum communicari posse affirmat.

Ex omnibus, quae adhuc allata sunt, haec fere, quae sub-
Ratiocinationes.

- 1) Trichosim sui generis morbum dyscrasica natura praeditum habendam esse, qui in assimilationis organis radices capiat.
- 2) Semper ei proclivitatem inesse ad specificam materiam morbosam, quam nos trichomaticam diximus, formandam.
- 3) Tempore formationis expulsionisque vel aberratione ejus materiae affectiones tum acutas, tum chronicas, exsistere posse, quibus tamen specifica illa trichomatica indoles non desit.
- 4) Trichosin trichomate non formato apparere et resolvi posse.
- 5) Trichomata, quamvis characteristica trichoseos phaenomena sint, tamen nullam vim criticam habere posse.
- 6) Externam veri trichomatis speciem, nisi rerum conditionis, qua formatum sit, ratio habeatur, perquam fallacem esse.
- 7) Pieraque trichomata ob superstitionem capillis arte intricandis facta esse et

8) Certis in casibus materiam trichomaticam ex capitis cute excretam, quatenus in sanis hominibus trichomata producantur, contagiosam esse posse.

Definitio trichoseos et trichomatisque definitionem exhibere posse videmur:

Trichosis naturae dyscrasicae morbus est, qui variarum telarum systematum et organorum animalis organismi specifica affectione vel acuta vel chronica, in continua formatione, expulsione aut depositione materiae morbosaе ipsi soli peculiaris, cui praeter aliam indolem id maxime proprium est, quod cute excreta capillos contactos intricat, consistit, quique postquam haec materia, quam trichomaticam dicimus, formari desit, totaque expulsa est solis organis crisin efficientibus, sanari potest.

Trichoma autem capillorum intricatio est, materiae per cutem excretae vi, nulla follicularum affectione prae-grediente, provocata, quae, quamvis trichosi peculiaris tamen in ejus decursu nihil majoris momenti habet.

De modo quo intricationis fieri possit. Jam ad aliam quaestionem solvendam progreedi liceat: quomodo intricationis actus fiat, quibusque rebus vim exercen-

tibus efficiatur? Ex factis supra prolatis trichomatica materia ex capitis cute recens exsudata sola capillorum intricationem produci patet follicularum capillarium affectione non praegressa⁶⁾ p. 216, 217, 232; ⁷⁾ p. 339 atque ⁶⁾ p. 212; ⁷⁾ p. 346; ⁵⁾ p. 15; ⁹⁾ p. 26. Itaque quasdam in ipsis capillorum truncis commutationes principio quodam intricante materiae trichomaticae proprio provocatas esse necesse est. Tum eas mutationes, tum efficiens principium ut consideremus, chemiae et microscopii ope nobis contingit. Igitur arte dignum est evincere 1) quae pars materiae trichomaticae et quantopere diluta et quantum per temporis spatium agens non solum in trichomaticis sed sanis quoque hominibus capillorum intricationem efficere possit; unde accuratam chemicam analysis trichomaticae materiae summi mo-

menti esse facile cognoscitur. 2) quae microscopicae primitivae formae in eadem materia reperiri possint. 3) Quae commutationes in trichomaticis sanisque capillis ante tempus exsudationis, vel tempore exsudationis ipso vel postea, quantaque cum celeritate procedant. 4) quibus rebus et quam cito trichomatica materia propria capillos intricandi facultate exuatur; quae forte mutationi inventae ratio cum ipsius trichoseos decursu intercedat. 5) quod discrimin inter recentia veteraque trichomata sit, quoque modo ipsa trichomata in capillorum vegetatione vim exhibeant. Ad has quaestiones ut rite respondeatur, chemiae et microscopicae amplum curriculum patet.

Eae explicationes quas de capillorum in trichosi intricatione habemus, variis hypothesis nituntur, quibus demum microscopicis et chemicis observationibus adhibitis aliqua addi possit fides. Sic *Lafontaine*²⁹⁾ p. 344 capillorum intricationem inde deducere conatus est, quod trichomatica materia in singulos capillos penetrans ex eorumque finibus liberis proveniens, capillos inter se implicaret. Qua ratione tamen non intratio sed sola capillorum inter se congregatio et conglutinatio expediri potuerit. *J. Frank*¹⁾ p. 320 viscidam exsudatae materiae naturam pro capillorum intricationis causa esse judicat, cui tamen opinioni quod contra Lafontaine dicebatur objici poterit. Capilli enim tam viscida materia in trichoma transgressi, fere eodem modo quo cola a lignariis adhibita, at demum post exsicationem, conglutinentur; quem tamen e contrario recens trichoma semper humidum appareat. *Marcinkowski*⁹⁾ p. 42 intricationem a morbosa materiae capillaris secretione in folliculis capillaribus facta, derivat, in quam quidem sententiam plerique medici discedunt. Quam parum defensionis ea sententia habeat jam ex allatis factis luculenter patet. *Oczapowski*⁶⁾ p. 218 intricationis causam in materia exsudata, praecepue in volatili ejus principio, odore acri praedito ponendam esse censem. Quae opinio, quippe quae factis maxime probabilis videatur, demum directis chemicis microscopicisque observationibus plurimum ad-

miniculi nanciscatur. Szokalski ⁷⁾ p. 339 pariter principium intricationem efficiens in materia exsudata positum esse contendit, subtiliore tamen sententiae suae explicatione omissa.

Investigationes chemicae et microscopicae, quae solae de microscopico mechanismo intricationis capillorum atque de materiae, quae eam picae et chemicae, efficiat, natura certiores nos reddere possint, ad hunc diem, quod vehementer dolendum erat, in vetustis trichomatis instituae fuerunt. Quod fungi in trichomatis inventi sunt sine dubio viris doctis gratissimum esse debuit, quamvis ut origo et formatio trichomatis inde explicetur sufficere ea res non videatur. Sic Walter ³⁰⁾ p. 411 in veteribus trichomatis capillis magnam multitudinem minorum, simplicium rotundarum vel regulariter ovalium vesicularum medio puncto insignium quarum diametrum erat 0,013"; et alias vesiculas mediae magnitudinis, quae ex duabus vesiculis, quarum altera in alteram incapsulata est, consistebant, reperit. Hae utriusque generis vesiculae, capillis communi aqua madefactis, alacrem motionem mollicularem edere dicuntur, quae sublimati solutione agente sistatur. Amplissimae autem vesicularum, quas observavit, duas vel tres interiores vesiculos continentem, motum non exhibuerunt. Haec tria vesiculae genera in trichomatica materia extare feruntur, neque vero unquam vir doctus surculorum vel bacillorum in vesiculis formationem reperit. Earum organicam naturam esse ratus epiphyta ventilata nominans, motionem mollicularem vesicularum minorum et medianarum si quidem capilli nondum intricati essent, vel efficacia in capillis vel in filis linteis, quae in trichomatis maximeque vetustioribus fortuito admixta magno numero inveniri solent, exhibita, intricationem non parum adjuuisse credit. E contrario Günsburg ³⁴⁾ p. 412 trichomatis efformati causam in fungis, quos in folliculis capillorum trichomaticorum observatos mycodermata plicae appellavit, ponendam esse judicat. Altero in libro ³⁵⁾ p. 34 fungum ab ipso inventum, quem meliori nomine trichomaphyton vocat, in capillis radices vaginae incrassare, truncos replere et utris in modum inflare, singulas trun-

corum fibras dispellere, vel simpliciter findere, fibrasque capillorum ut ipse per se formari incipient, aristarum instar dissolvere, finesque in fasciculos discindere, et fasciculos truncorum in novo producto implicare, involucra epithelialia incrassare, denique multos capillorum truncos ad marcescendum redigere refert. Vesiculasque medias et maiores quas Walter observavit pro fungo ex cellis primae formationis orto, minimas, quibus solis motionem rotantem adscribit pro cellis secundae formatio-
nis ex gemmis fungi jam exculti natis habet. Idem Walterum eo optime meritum esse censem, quod trichomaphyta, quae ipse antea non invenerat, nisi in radicibus truncisque capillorum, in trichomatica quoque materia reperisset. Evidem quin viri existimatissimi in praeparatis quae observarunt, ea quae memorant, re vera viderint, in dubium non vocaturus sum. Quamquam de Günsburgii priore observatione Szokalski ⁷⁾ p. 342 paululum ad dubitavit, qui suum collegam Gruby Parisiis identidem sibi affirmasse ait, in praeparato quod pro documento sua sententiae Günsburg ad academiam Parisios miserat se quidem, quae Günsburg invenisse sibi videbatur nequaquam reperisse. J. Müller ³⁵⁾ p. 42 ipse ad alteram Günsburgi commentationem adnotat, doctorem Münterum, observatorem in pervestigandis epiphytis exercitatissimum nullum in trichomate epiphyton invenire potuisse. Virorum doctorum observationes ideo quod ipse non videris, rejicere, mihi quidem, nimium videatur. Namque testimonium viri existimati, pluris quam multorum aliorum, qui non viderunt faciendum esse censeo. Id saltem ex omnibus his manifestum est, fungos nonnunquam in trichomaticis capillis eorumque folliculis, vel in trichomatica materia inventos esse. Si epiphyta occurrunt id non multum ad trichoma efformandum valere ex sequentibus appareat: 1.) quod, fungi non semper nunc in capillis nunc in folliculis, nunc in materia trichomatica inveniuntur, id eos non omnino necessario ut trichoma formetur et exstet efficere monstrat 2) alii parasiti quamquam non raro in variis morbis productis reperiuntur ³⁶⁾ p. 468, tamen non constanter adsunt, unde

secundum pervestigationes a *Pappenheim*³⁷⁾ p. 154 et *Hannover*³⁸⁾ p. 286 institutas, ad morbi processum non necessarii in numero 70 casum tantum quatuordecies deprehenduntur; 3) trichomatum per hos fungos formatio experientiae et observationibus de trichoseos ut morbi evolutione et decursu institutis contradicit.

Trichomaticae materiae chemica analysis accuratius instituta fuit a cl. *Hünefeld*³⁹⁾ p. 16, neque tamen certi quidquam ex eadem emanavit. Is in trichomate minus adipis quam in sanis capillis, atque in trichomatica materia animalem materiam osmazomaticam, ad decomponendum facilem invenit, quae neque tali natura, neque tam larga in sanis capillis inesse solet. Adversus eam investigationem id quoque afferri possit, quod quemadmodum ipse Hünefeld confitetur, trichomata plurimas alienas admixtiones, sicuti mortuos acaros, fibras lanae sericique, pulverem et papilionum et culicum alas, similia insecta continebat, quae omnia trichomaticis capillis maceratis, malaxatis, et pertritis, ut materia trichomatica a capillis secerneretur, necessario simul pervestigari debuerunt. Tales trichomatici liquoris perquisitiones chemicae, ut certae de ejusdem natura inde deducantur conclusiones, in materia, quantum fieri potest, recentissima, antequam satis temporis aliena admiscendi adepta sit, institui oportet, quod quidem a viris clariss. *Weigert* et *Stern* mox susceptum iri, Günsburg nobis pollicitus fuit.

Quod autem ad commutationes in truncorum, quales trichomatici capilli ostendunt, structura attinet, plerique saltem ut cl. Remak, Hünefeld, Günsburg etc. consensu capillos diffindi, nodosos, tenuiores et lucidiores evadere affirmat. Nas in capillorum truncis mutationes in efficiendis intricationibus trichomaticisque juste minoris momenti habitas esse crediderim. Priusquam diligentius rem explicare incipiam, nonnullas observations microscopicas, in trichomate maturo et genuino factas praemittere mihi licet.

Id trichoma uxorii erat militis ex Vilnae vicinia oriundae, *Historia* triginta duos annos natae. Ante sex annos intra trium dierum *morbi mulieris,* spatium, lapsu et terrore praegressis, cum vehementibus capitis *cujus a me investigatum est trichoma.* doloribus, cum febri acerrima, multoque sudore intravit. Trichomate effecto febris cum capitis doloribus cessit at trichoma quod stricte ad caput adhaesisse ferebat, cum viscida cutis capitum exsudatione remansit. Num autem antequam trichoma fieret aliae quoque trichomaticae affectiones affuissent, et solo terrore ex lapsu injecto vehementior succorum ad caput affluxus extitisset, eoque facto crisibus per sudorem et insecuta trichomatis formatione morbus evanesceret; an morbus in corpore latens causa excitante primum erumperet, breve perfecta sudoris crisi, resloveretur, mihi ex iis quae femina narravit certo cognoscere non contigit. Processum autem trichomaticum sex annorum spatio saepius repetitum fuisse, trichomatis ipsius natura monstravit, quod tribus locis inflexum in intervallis crassiores nodos capillorum implicatorum ostendit, quod ex sanis capillis procrescentibus, novis trichomatici sudoris excretionibus intricando in novum trichoma transgressos esse, verisimile visum est. Nihil accuratius de statu feminae, qualis intra sex annos fuisset, comperire licuit, nisi quod eo tempore ulceribus in palatis se laboravisse dixit, quae ibidem cicatricibus relictis uvulam destruxerunt. Ea ulcera autem num syphilitica fuerint, an trichomatica, certo a me non potuit explorari.

Materiae trichomaticae formatio, per sex annos continuata, ejusdemque secretio, tantundem temporis durans cum trichomatum evolutione conjuncta haud dubie pro momentis in trichoseos natura satis gravibus haberi posse videntur. Trichoma trium dierum tempore acerrimis capitis doloribus, motibus febrilibus sudorisque excretionibus comitantibus formatum, certe nisi genuinum esse non potest. Trichoma cum desecaretur ad occiput sedebat, ab eo sanis capillis, quorum longitudo unius et dimidii pollicum erat, disjunctum. Cutis, quae, ubi trichoma erat, paululum intumuit et rubefacta erat, in superficie irregularibus

marginibus terminatas excoriationes, subflava duriuscula crusta obiectas praebuit. Quae omnia morbosa in capitis cute phaenomena, decem diebus transactis, tota, leviore tantum tumore remanente, evanuerunt. Feminac sudor conspicuam acidam reactionem prae se tulit. Tempore, quo trichoma desectum est, mulier de capitis doloribus intermittentibus, qui a certis diei temporibus, coelique temperie non dependere videbantur, et de aurium gravitate, quae breve ante tempus initium habuerat, conquesta est. Eae molestiae post desectum trichoma non ita auctae apparebant, num autem trichomaticus processus reversurus, novaque trichomatis formatio proditura esset, euidem usque ad ultimum tempus, quo seminam inspexi, certo exquirere non potui. Aegrotae ut caput calidius servaret, neve tamen a pectendo desisteret praecepi, ut, si quidem trichomatica capitis exsudatio rediret, num capillorum intricatio, si qua forte intraret, sola trichomatica materia agente, procederet, persuadere mihi possem. — Mulier, quae liberos sanos pepererat, neminem praeter se in sua familia trichosi laborare narrabat.

Trichoma desectum duos pedes paris. longum erat, loco crassissimo ambitum quinque pollicum, in tenuissimo trium habebat. Latitudo ejus, qua maxima erat, duos pollices efficiebat; qua minima unum; crassities maxima dodrantis pollicis erat, minima dimidii, pondus sex unciarum repertum est. Colore trichoma erat subrubicundum, multoque lucidioribus, capillis, quam, qui postea procreverant, cernebantur. Tota copia trichoma efficiens glomum inexplicabilem, durum formabat; in quo multum sordium, pennarum, taeniarum, funiumque conspici potuit. Oculis nudis etiam quemque capillum in apice intumuisse et quasi pulveris atomo obsitum videre licuit; hic illic singuli capilli bifurci vel trifurci deprehendebantur. Locis crassissimis et durissimis incisis, capillos variis modis inflexos et inter se multiplicibus conversionibus perturbatos videbamus; inter quos passim nonnullis locis materia subflava siccaque interposita erat.

Ea macerata colorem flavidο-albidū induebat et calefacta odorrem ingratum, foetidum emisit.

Investigationes microscopicae ope minimi microscopii Schi-
Meae ipsius mikckiani, vitro subjecta ducenties quinquagies tanta ostendente, crosco-
picæ et a nobis institutæ fuerunt. Consecuta inde haec sunt:

1) Capilli qui in apicibus jam primo aspectu intumuisse videbantur, in locis tumidis fibrillas tenuissimas in diversas partes radiantes praebabant; inter quas substantia intermedia, superficiem inaequalem, asperam offerebat. Capillorum trunci singulis locis tenuia fila, ab ipso discedentia ostendebant et in medio saepius fibrata truncorum structura satis clare cernebatur. Nonnullæ ex fibrillis in medio trunco eum in modum distincte expressæ erant, ut capillus in eos dilabi videretur. Canalis medullaris non ubique cerni poterat. Praeparato aqua communi humectato capilli intumuerunt, fibrillaque erectæ, pellucidiores inter se appropinquabant. Substantia interjacens, quae postea intumuit, fibrillas rursus distraxit. Tali praeparato sicco ope liquoris kali caustici tractato, jam sub microscopio substantia inter fibrillas interposita in capillorum apicibus pellucidior visa est, id quod a partis solutione dependebat. Liquore kali caustici 10—15 sexagesimas vim exhibente, singulas fibrillas, postquam conspiciue intumuerunt, erectas, simplices prolongationes fibrilarum truncum maternum constituentium apparentes, facile per totum truncum oculis persequi licuit.

2) In multis capillis pariter conspicua intumescentia in medio atque in apicibus observari potuit. Sub microscopio ea intumescentia massæ friabili similis visa est, quae fibrillis, a trunco discedentibus, vario modo inter se perplexis inclusa erat. Liquoris kali caustici vi longius continuata, substantiaque intermedia aliqua ex parte dissoluta, capilli in locis, ubi intumuerant, in duas partes divisi apparebant, cum suis fibrillis inter se disjunctas. Utraque pars diversorum capillorum videbatur esse. Saepius in loco tumido duos capillos in congreendo angulum efficere, vel, si capilli pluribus locis dividebantur, singularium

partium fibrillas inter se circum substantiam intermedium, ante memoratam, contexi cernebamus.

3) Quod ad truncorum ipsorum fissionem attinet, tres dilabendi modos in iis internoscere potuimus: a) primum singulae fibrillae variis locis simpliciter a trunco materno recesserant atque aculeorum in modum distabant; b) capilli laminarum instar per truncorum longitudinem finebantur, ita ut quaeque pars latitudine quidem trunco materno fere par esset, tamen pro numero fissionum tenuior. Truncus, aqua communi turgescens, ante fissionem distincte cylindricus visus est, in marginibus multo fuscior, in loco desectionis specie subrotunda, dum partes fissae pellucidiores factae, tenuioris membranae instar, extensa jacent, et vix in marginibus certius circumscriptae sunt. Liquore kali caustici vim exhibente, fissionem laminis factam ex capillorum fibrillis arete altera ad alteram adjacentibus, nullum inter se intervallum relinquenter, consistere cognoscebamus; c) fissio raceformis, plerumque in apicibus capillorum deprehensa est. Singuli rami qui interdum duo aut quatuor numero ex capilli apice exibant, pariter atque truncus maternus cylindrici erant, canale medullari praediti. In singulis ramis, nec non inter fibrillas a trunco discedentes saepius non parva intermedia substantia deposita erat. Quisque ramus non raro in singulas fibrillas dilapsus cernebatur.

Ad notatio. Omnes capillorum trunci, quos in numeris 1, 2, 3, mutatos fuisse memoravimus, multo tenuiores, angustiores et lucidiores erant, quam ejusdem mulieris capilli sani. Omnibus his capillis trichomaticis multi furfures epidermici, stricte insidentes, asperam speciem induerunt.

4) Majore multitudine capillorum trichomaticorum, minutatim concisorum, aqua communi humectata, microscopioque subjecta, si quidem magis a superficie trichomatis sumta fuerat, magnam massae partem ex alienis admixtionibus consistere videbamus, ut ex lini et gossypi filis varii caerulei vel rubri coloris, ex multis pulveris granulis et majore copia furfurum epi-

dermicorum. Ipsi capilli autem varia erant crassitie nunc sanis ejus mulieris multo crassiores, id quod etiam ab illustr. prof. *Bidder* observatum est⁴⁰⁾ p. 547, nunc aliquanto tenuiores quod pariter a cl. *Remak*⁴¹⁾ p. 363 atque cl. *Hünefeld*³⁹⁾ p. 27 allatum est*). Capilli crassiores, colorem exhibebant fusciorum et turgidi videbantur, nullo in medio pellucido canale formato, tenuiores contra perquam perspicui quasi complanati, pigmenti valde egentes et canale centrali praediti, substantia quadam paene repleto, quae, kali caustico vim exserente, hic illic in massam friabilem coiit. Multi capilli inter se circumplexi erant, nonnulli eorum circa alios, multiplicibus flexionibus extensi in modum laqueorum inter se complectebantur.

5) In folliculis capillorum trichomaticorum, investigationibus identidem institutis, nihil morbosi invenimus. Saltem nihil insigne praebebant, quo ab iisdem sanorum capillorum ejusdem mulieris partibus discerni possent.

6) Massa flava, siccaque quae compluribus, locis inter intricatos trichomaticos capillos inclusa jacebat, microscopio submissa et aqua communi tractata, plerumque satis multas, albidas, perspicuas, magna lucis frangendae facultate praeditas, maiores minoresque cellulas, interdum puncto medio conspicuas praebebat vel ita compositas, ut minores in maiores encapsulatae cernerentur. Semel tantum, ut rotantem majoris vesiculae motionem deprehenderem, mihi contigit. Alios autem movendos, in reliquis vesiculis visos, tantum ad liquoris in quo suspensae erant motionem ejusque evaporationem referendos esse censeo. Externa specie haec vesiculae minoribus majoribusque a cl. *Waltero* descriptis non dissimiles fuerunt. Attamen ad ipsos capillos, si aqua communi madefacti erant, nullas tales vesiculas reperi, furfures epidermicos autem permultos.

*) Sic *Remak* trichomaticorum capillorum crassitatem triente minorem dicit esse quam sanorum; *Hünefeld* accuratissime capillos sanos et trichomaticos emensus, numero medio sanos capillos vult esse 0,0307", trichomaticos tantum 0,0259"; igitur sexta parte illis tenuiores.

Praeter has mutationes in diversis praeparatis diversoque tempore observationibus institutis nihil insigne obvium fuit.

Chemica materiae solutae siccae flavaeque examinatio, nec non liquor maceratione variarum trichomaticorum capillorum multititudinum obtentus, semper neutralem reactionem edidit. Nonnullorum reagentium cum hoc liquore rationi vix multum momenti inerat, quum quemadmodum diximus permultae admixtiones in liquorem examinandum receptae fuerint. Cuprum sulphuricum oxydatum in liquore filtrato praecipitatum calefaciendo non dissolubile fecit; Kali-ferro-hydrocyanicum, aliquot guttis acidi acetici accendentibus nullum praecipitatum edidit, id quod albumen deesse indicare videtur. Aliquot guttis liquoris kali caustici admixtis gasum ammoniaci odorem emittens formatur. Teste *Hünefeld*³⁹⁾ p. 18, qui eadem agendi actioni adhibita eundem odorem animadvertisit, is ex decompositione ammonii lactei ope kali et ex gasi ammoniaci evolutione oritur.

Invenimus igitur 1) diversam fissionem et variis locis dilapsionem singulorum tenuium capillorum in fibrillas constituentes earumque inter se complexionem vel eorundem capillorum alterius circa alterum, circumflexionem. 2) capillos, qui non fissi nec dilapsi erant, crassiores, obscuriores et quasi tumidos. 3) partes in capillorum in cute positas statu sano. 4) in materia trichomatica humectata complures cellulas majores vel minores, simplices vel alteram alteri encapsulatas, motione propria carentes. 5) Multas alienas, et fortuitas admixtiones inter capillos trichomaticos. 6) Neutralem reactionem trichomaticae materiae, in aqua solutae et capillorum trichomaticorum pariter in aqua communi maceratorum. 7) Acidam reactionem sudoris mulieris, cuius trichoma erat.

Hypothesis de modo quo ex tempore sex annorum formabatur, in quo non satis sciri trichoma exorta posset, quae mutationes ad trichomaticae materiae actionem, quaeque ad vim trichomatis evoluti, in trichomaticorum capillorum nutritione exhibitam, referenda essent — omnino de tri-

chomatis formatione effecta certi quidquam desumere conemur, non sine causa temeritatis crimen nobis inferri posse videatur. Tantum cum aliqua veritatis specie assumi potest, vi trichomaticae materiae quasdam mutationes in truncorum structura effectas occurtere, cum adeo sani alieni capilli a radicibus suis desecti nec non capillamenta artificialia⁶⁾ p. 216, 217, 252 et⁷⁾ p. 339, trichomatica capitum exsudatione humectata, idque tanta cum celeritate implicantur⁵⁾ p. 15; ⁶⁾ p. 212; ⁷⁾ p. 346; ⁹⁾ p. 26, ut nonnunquam adeo in pectendo in trichomata inextricabilia commutari sciamus. Itaque quidam mechanicus processus in capillorum truncis intricandis statuendus est et quaedam in eorum structura commutatio ponenda. Quum nos autem in trichomate observato nullam aliam in truncorum structura commutationem, qua quidem intricationis actus explicari potuerit, invenerimus, nisi quarum sub numeris 1—4 mentionem intulimus, cum aliquo jure has mutationes ex trichomaticae materia efficacia derivare videmur. Jam illustr. prof. *Bidder*¹⁰⁾ p. 538 trichomaticis capillis consideratis sententiam protulit, qua certo quodam loco truncorum morbosum processum initium capere credit. Et negari nequit truncos certo quodam loco continuitatis in fibrillas constituentes dilabi, quae cum variis modis inter se complicantur, primum intricationis ideoque trichomatis fundamentum jaciant. Observatione de trichomaticis capillis supra prolata nos quidem eam sententiam amplecti adducamus, ut principii trichomaticae materiae intricantis vi singulos capillos coagulatione cystoblastemate spoliatos indeque tenuiores factos in fibrillas constituentes dilabi opinemur, quae perplexae coagulatum cystoblastema sub forma massae friabilis inter se recipient. Contra eos capillos, qui dilabendi processui resistant, liquidum recipientes turgescere spatiumque, quod inter dilapsos tenuiores capillos remansit, magis minusve implere, putaverim, quo tempore etiam viscidae materiae depositione capilli intricati simulque inclusi, in glomum humidum atque inextricabilem cogantur. Quod autem alii capilli dilabi, alii non

dilabi putantur, iis quae experientia docet non omnino repugnare
videtur, quum trichomaticam capillorum intricationem nonnun-
quam non ultra singulas capillorum collections et fasciculos
⁹) p. 211, 526; ⁺) p. 342; ⁻) p. 14, progredi constet. Et
quidni capillos, ad dilabendum maxime inclinatos, in principii
intricantis volatilitate quadam, prius intricari credas, quam alios,
qui longius per tempus dilabendi processui obsistentes, postea,
si principiam intricans jam evolavit, nihil nisi liquidum ex ma-
teria trichomatica recipient turgescantque? Sic microscopii ope-
ratur genus capillorum tenuium intricatorumque et crassior-
um, non intricatorum observandi occasio nobis non defuit.

Jam quaeritur, quae maxime pars trichomaticae materiae
intricationem provocet? Plerique observatores ut *Oczapowski*^{⁶)}
p. 201, *Kaszkowski*^{⁷)} p. 208, *Moll*^{⁸)} p. 207, et alii tri-
chomaticorum sudori volatilem sub acidumque odorem inesse
ajunt, unde, quoddam acidum in trichomatica materia contineri,
suspiciari liceat. Reactio autem siccacae trichomaticae materiae,
ut a cl. Hünfeld et a me ipso animadversum est, neutralis
fuit; unde acidum, quod adesse conjicio, si quidem in omnibus
trichomaticis materiis occurreret, inter volatilia esse, ideoque in
veteri trichomate non repertum concludatur, quia in accelerata
ejus evolutione calor cutis jam trichomate extante et calidioris
capitis integumenti usu non parum aductus non mediocrem vim
habeat. Deinde solam recentem trichomaticam materiam, quae
hoc aetherico acidum olente principio in praegnata sit, neque
vero materiam veterem et siccacae capillorum intricationem pro-
ducere cognitum est; unde si tale acidum in vetustiore aliquo
trichomate deficiat mirum id videri non possit. Quum autem
omnino acidis ut acetico, muriatico capillos desectos, in quibus
longius vel brevius tempus vim exhibuerint, in fibrillas consti-
tuentes dilabi exploratum sit, ea analogia ducti nos hocce acido,
quod hic obiter trichomaticum appellare liceat, pariter atque
aliis capillorum dilapsionem in hominibus trichosi laborantibus
effici credierimus. Haec explicatio, qua trichomata mechanico

processu singulis fibrillis trichomatici acidi vi inter se intricatis
oriri dicebamus, simplex quidem est: utinam eadem vera sit.
Nostra enim sententia si confirmabitur, intricationi ut phaeno-
meno fortuito in trichoscos decursu non necessario ulla critica
vis attribuenda sit. Altera autem viscida pars trichomaticae
materiae, quam fixam dicamus, quamque magis minusve mutatam
in plerisque trichosi affectis organis telisque reperimus, for-
tasse ad depositiones trichomaticas proclivior putetur.

His paucis, quae tantum pro conjectationibus haberi velimus
brevi nostrae de trichosi dissertationi finem imponimus, certa
spe animo concepta, viros doctos nostrae aetatis, quae tam
alacri studio apertae evidentiae excellit, ad hanc quoque gravem,
non parvi momenti partem pathologiae, pro rei dignitate, animos
conversuros esse. Positivis investigationibus adjuti, nos
de natura et curatione morbi certiores reddent, qui ex trium
saeculorum tempore vera calamitas magnae incolarum mediae
Europae multitudini instat, quique, quemadmodum medici con-
sensu memorant, novissima aetate tam terribilem in modum
praevalere et dominari incepit.

**Libri in usum vocati eodem quo citati sunt
ordine.**

- 1) **J. Frankii.** Praxeos med. universa praecepta. Lipsiae 1815. Pars I. vol. II.
- 2) **Gumpert.** Ueber den Ursprung der plica polonica. Rust's Magaz. 1858. B. 51.
- 3) **F. Brandt.** O. kołtunie w Pamietniku lekarskim. Warszawa 1850 t. II.
- 4) **J. Fr. Hoffmann.** Beschreibung des Weichselzopfs. Warschau 1826.
- 5) **L. Knothe.** Dissert. de plica. Vilnae 1850.
- 6) **J. Oczapowski.** Praktyczny wykład chorób kołtunowych. Warszawa 1859.
- 7) **V. F. Szokalski.** Der Weichselzopf etc. Archiv für physiol. Heilk. v. Roser und Wunderlich. 1845. 4ter Jahrg. II. 5.
- 8) **J. F. Schlegel.** Ueber die Ursachen des Weichselzopfs etc. Jena 1806.
- 9) **K. Marcinkowski.** Uwagi nad historyą i naturą kołtuna. Kraków 1856.
- 10) **Lessing.** Handbuch der Geschichte der Med. Berlin 1838. B. 1.
- 11) **K. Weese.** Ueber die plica polonica. Rust's Magaz. 1828. B. 25.
- 12) **Beschorener.** Der Weichselzopf nach stat. und phys. Beziehungen. Breslau 1843.

- 13) **K. Weese.** Der Weichselzopf. Ein Beitrag zu seiner Statistik und Geschichte. Berlin 1845.
- 14) **Lafontaine.** Chirurgisch-medicinische Abhandl. versch. Inh. Polens betreffend. Breslau und Leipzig 1792.
- 15) **J. C. Chromy.** Najnowsze dostrz. nad chorobą kołt. Kraków, 1809.
- 16) **Fritsch.** Der Weichselzopf ein Kunstprodukt. Cannst. u. Eisenm. Jahresb. B. 2, 1846.
- 17) **Canst. Jahresb.** 1845. B. 2.
- 18) **Chłędowski.** Rozprawa o kołtunie. Pamietnik warszaw. lek. Warszawa 1828.
- 19) **J. Schenk a Grafenberg.** Observat. medicor. lib. VII. Frankforti 1609 (prima editio Basileae 1584 secundum Lessing et Weese.)
- 20) **J. Rosenbaum.** Der Wichtelzopf etc. Schmidt's Jahrb. 1840. B. 25.
- 21) **Raisin.** Recherches sur la plique polon. Annuaire de la société de médecine du département de l'Eure p. l'année 1809. Evreux.
- 22) **Martini Cromeri.** De origine et rebus gestis Polonorum. Libr. XXX. Basileae 1555. Liber X.
- 23) **Joannis Dlugossii** historia Poloniae libr. XII. Lipsiae 1711. Liber VII.
- 24) **Naruszewicz.** Historya narodu polskiego. Warszawa 1805 T. 5.
- 25) **A. Lebrun.** Essai médicale sur la plique polonaise. Paris 1827.
- 26) **Военно медицинский журналъ.** ч. 48 Nr. 2. 1846.
- 27) **Malez.** Kilka uwag nad charakterem choroby kołt. Pamietnik lek. T. 2. Warszawa 1850.
- 28) **Car. Kaczkowski.** Dissert. de plicae polonicae in varias, praeter pilos, corporis humani partes vi et effectu. Vilnae 1821.
- 29) **Lafontaine.** Dziennik zdrowia dla wszystkich stanów Nr. 6–7 o kołtunie. Warszawa 1802.
- 30) **v. Walter.** Ueber Epiphyten auf Weichselzöpfen. Müller's Archiv 1844.

- 31) **O. Moll.** Beobachtungen über den Weichselzopf. *Cannst.*
und Eisenm. Jahresb. B. 3. 1846.
- 32) **Grum.** О. колтунъ. Мориаевъ 1828.
- 33) Dictionnaire de médecine. Paris 1842. B. 25.
- 34) Archives générales de médecine. 4. Série. T. 3. 1843.
- 35) **Günsburg.** Ueber Epiphyten in den Weichselzöpfen.
Müller's Archiv 1845.
- 36) **Rokitansky.** Handb. der pathol. Anat. Wien 1846.
Bd. 1.
- 37) Walter's und Ammon's Journal für Chirg. und Augenh. B.
34, 1845.
- 38) **Hannover.** Ueber Epiphyten auf d. Schleimhäuten.
Müller's Arch. 1842.
- 39) **Baum.** Beitrag zur Pathol. des Weichselzopfes. Rust's
Mag. B. 61. 1843.
- 40) **Dr. Bidder.** Einige Bemerkungen über Entstehung,
Bau und Leben der menschlichen Haare. Müller's
Archiv 1840.
- 41) Schmidt's Jahrb. B. 33. 1842.
- 42) *Cannst. und Eisenm. Jahresb. B. 3. 1846.*

T H E S S.

- 1) Homoeopathiae non est artis medicae sistema formare, quum ne methodum quidem sibi vindicare possit.
- 2) Veri artis medicæ progressus ab eo demum tempore incipiunt, quo illa naturalium disciplinarum pars haberi coepit, est.
- 3) Violenta recens genitorum mors suffocatione effecta, ex sola pulmonum investigatione demonstrari non potest.
- 4) Prolapsae extremitati infantis, atque uteri post aquarum in partu defluxum contractioni vehementi, primum ope medicamentorum internorum mederi oportet.
- 5) Nervus sympatheticus per se proprium nervorum sistema efficit.
- 6) Tuberculosis et scrophulosis non nisi sede differunt.
- 7) Blennorrhœa urethralis, num syphilitica sit nec ne, nonnisi ope inoculationis discerni potest.

CORRIGENDA.

Pag. 15 lin. 21 pro „Marrenflechte“ legas: *Marenflechte*.
 „ 16 „ 11 „ „Gwoždziec“ „ „ Gwoździec.
 „ 16 „ 16 „ „pucutiensem“ „ „ pucutiensem.